

Alas

Terza classificata al concorso di Poesia "Quartucciu 2008"

Furadu m'an sas alas, sas biancas
de cudda lestra lestra pitzinnia,
sa chi sonniait incunza 'e galania
semenande in su coro birdes tancas.

Cando colao a bolu in sas carreras
peri benes e males de Sardinna
cando zuighe e ispada fit sa pinna
e parian sas cosas prus bragheras.

Sas promintas de vida accaenturadas
parene bive' como in sos amentos
e sas visiones d'ateros mementos
s'istraman tra medallas ruinzadas.

Totu m'apo castadu, ocros e coro,
in milli 'anzelios de sa veridade;
pazinas de zustissia e libertade
d'illusiones oarrande unu tesoro.

Com'est pasande cudda chirca manna
de paraulas e sonos e sentidos
chi paris chin sos annos son fuidos
a cudd'ala 'e s'arcanu d'una janna.

Chi non bincana nudda e boidore
li dimando a su male de sa vida
ne mai arrumbet s'anima sidida
de s'arcanu fecundu de s'amore.

In andala astraada, solu solu,
cara a n-ue morit sole ando pianu;
pariat eris ... s'eris est lontanu ...
e su tempus leandemi est a bolu.

Mi leat a bolu chene m'iscapare
in sas arturas chene torradortzu.
In cale chelu, in cale s'iscusorzu?
In cal'isteddu amparu ap'acatare?

In su caminu istranu de sa sorte
b'at unu frore iscuru e tosconosu
chi donni'omine rendet timorosu
cando s'intendet s'alinu 'e sa morte.

A passu lentu sigo a avantare
tzertu chi su caminu at a finire
e finat prudere, famene e patire
in chelos inue totu an a pasare.

A Luisi Ladu

Meda l'amus chircad'in custos annos
sos sardos de cuncursos e porfias
u'armados de contos e poesias
amus chertadu chin poetas mannos.

Leande cando nudda cando pannos
amus connottu premios e giurias
chi nos an dadu gosu e tribulias
chi nos an dadu brias e impannos.

In sos elencos de sos premiados
chi Luisi po nois at iscrittu
amus chircadu tott'abolottados.

E si su coro si nos faghet frittu
ca in d-unu logu non semus colados
su mes'iffattu torramus a pittu

e grassias a su situ ch'amus prontu
ischimus de "Calliope" donnia contu.

Animas

Romana 2013 Prèmiu poesia sarda "Tiu Finu"

Iscrio e isetto
no isco 'ene ite?...
Ma iscrio e isetto
in custu pasadorzu
ue boidu e fritu
mi cranculan su coro...
A intundu
presoneras de su mundu
animas de carre imboligadas;
de carres tirchinadas
dae su tempus chi cattigat e umiliat
dozas e lussos semenende...
In gurgos chene sole
ue sos deos no colan mancu 'e passu
sas impiedosas sannas
de bobois de ferru e tzimentu
animas solas istan gramuzande;
animas chi su 'entu ch'est leande
e istichinde
in sas prigas iscuras de sa vida.

Animas chene paghe e chene pane
animas chene limba
nen zustissia
presoneras
de s'arcanu 'e s'esistere
tra mareas de faulas afranzosas
e istocadas de ranchia veridade
chi sos ohis istratzan dae petorras
e sos ohis a sa terra
d'amacchios amacchiada...

In cust'irvaliu mannu
jeo iscrio e iseto
no isco 'ene ite?...
Ma iscrio e isetto
intas a cando
animas chen'anima
biven furande s'anima a su frade
biven furande s'anima a sa terra...

Carreras

Menzione d'onore Concorso di Poesia "Quartucciu" - Quartucciu 2014

A deghessett'annos
a tziocos e fadas creio 'alu
e sonniao su sonniu d'esistere
tra iscusorzos de oro e de coro.

A degheotto
s'anghelu de sa vida
chin ispada 'e puntillu e de bisonzu
jagarau m'at dae s'Eden
mandandemi
in donnia coladorzu de su mundu
s'anima mia a chircare.

Cantas carreras!...
Cantas nd'apo rugau
in custu 'iazu mannu
sutta rajos de fogu
e astrau punghigosu:
ruende e arrizande
chene paghe
chene pasu
chen'agattare
s'andala de su coro.

A settant'annos galu
so avantande a pesa-rue
in sa carrera istrinta
chen'iscusorzos d'oro
chen'alinu
chene lughe
troppu istragu d'essere
de 'idere
d'intendere...

Pessos in caminu perdidos
s'istana sas notte gaminande
e sas dies si fuin
chin calavrinas murras
in andalas chi 'etzos no isettan
lassandemi in buzacca
tres sisinos d'amentos
e mudines
ue tziocos e fadas
s'ammaju issoro sighin...

Chen'eris ne cras

Menzione al Premio di poesia "Tiu Finu" - Romana 2014

Lagrimas chen'istoria
nuddas noales
e lovros de timoria
in donnia rughe 'e caminu
mi faghene sa posta;
intas s'ispera
ingabera cumparit
in custa realidade
chen'edade ne iscampu.
Solu bisos d'irvaliu
reverdes paran fronte.

Perdidu
tra un'ecanteddu e-i s'atteru
che omine tzegu avanto
limusinas pedinde 'e veridade
de chelos chene nues
o nesis d'illusione
chi m'imbriaghet sas oras
e sas paraulas in pes non mi ruan.

No isco a n-ue avanto
ma ruere non cherzo
bestidu de gabànos ierriles;
no isco poite avanto
chin sa carre fatt'astrau
e s'anima istramada
dae milli bisos chi allattadu aiat.
A sa ventana mia de internet
sa luna in buca 'e risu non che lompèt.

Ap'amorau sa morte
ap'istimau sa vida.
Un'urtima visione
a banda dae tottu apo cuau:
chin chin idda
die e notte su coro mi caento
chen'eris e nen cras
in punzos ben'istrintu
s'amentu d'una cara
chi est passione e sonniu e fogu mannu
chi in tottu 'ortat su nudda
tra amacchios galanos e promintas...

Che pèssighe froriu

Menzione de Onore Cuncursu de Poesia Sarda "Antoni Piludu" XIX editzione – Annu 2012

Inue su seru 'e s'òmine si perdet
tra caminos de fogu e de lughe
ses cumparta
cando 'alu sas fromas de sa die
in ogros mi 'aghian su ballu tundu.
Chin cara curiosa m'as mirau:
che pèssighe froriu
chi losingat s'ùrtima 'iddighia
in sa pilucca de su mese 'e martu
chi ispantau
non ridet a sos rajos beraniles.

Cando sa luna
un'orassione 'e pratta pispisat
che fada ses colada
e pippìina
bestida d'innossessia
e che pippiu
chi trampas non conoschet
su coro non crompiu t'ap'intregau.

Tando est bènniu s'incras
e t'apo 'istu
mudada 'e milli 'estes e frocchittos
chi atteros mirain
e su coro
fresau
de zelosia manna e disisperu
in sa pettorra toccaiat furiosu.

In labirintu
de sonnu pèrdiu e làgrimas
m'as agattau su sero
e che isposa fidele
a su sìncheru sinu m'at istrintu
che abba gristallina de funtana
chi donnia male lavat
chi donnia sidu toddet
e un'orizzonte nou as iscanzau
in cust'andala mia disintzerta...
tue femmina mia
amante chene dudas chi mi mintit
un'eternu dilliriu 'e passione.

Eclisse

1° Premiu Setzione B "Premiu 'e poesia sarda Santu Mauru" Sorgono 2014

Umbras e illampizzadas
curren a manu tenta
truvande tazos de muvras de prata
chi in pittu 'e monte paschene sas nues.
S'ieru avantat
dae sa carrera 'e susu;
totu est a tremulia
comente chi sa morte
s'incunza sua irvetet:
soledade innantis
soledade issegu.
Pagos si pompian a intundu
pagos bisan
medinde sa 'ortaedie
a tasseddas de aspru cannonadu
e passos lestros de crogas purposas
in custu fromigarzu
de carres chi s'anima an perdidu.

Unu 'etzu pranghet
un'amentu in sa terra ingalenadu
e chircat sas istimas
sas raighinas chircat
dae janna in janna andande
in cherta 'e cuddos nuscus
de presessias connotas
foghiles d'amistade
chi nos limpiene s'anima imbrigada
dae dillirios de vida chene vida.
Povera 'idda mia
ue solu s'irvaliu paret bonu
ue solu s'irvaliu paret bellu.

A banda in mesu 'e zente
sigo sonnios reverdes
iscriendelos a literas nieddas
in sa cara bianca 'e su computer
chi mastrigat e irmartit
totu sos malos pessos...

...e mi rendo che a totu
a s'eclisse 'e miradas e paraulas
dae sos tempos noales decretada.

Frumene mannu

Andat lentu su frumene 'e sa vida
in sos caminos de s'eternidade
leandesiche chertos e amistade
chi sa pettorra lassana ferida.

Andat lentu, a su mare de s'arcanu,
trazande milli contos e un'ostinu
andat lentu, lassande in su terrinu,
de lastimosa mutria unu pantanu.

Andat lentu e m'abizo 'e no ischire
in sa corrente forte prus nadare
e m'intendo che truncu abbandonare
da-e s'indolente presse in su fuire.

Su casteddu d'isperas lugorosas
in d'una nue pruer s'est ziradu
da-e su 'entu 'e sos annos solovradu
sutta sas manos fortes e operosas.

Manos chi ischidu no han trattenere
sas prenda de incantu e galania
ditzosas che unu 'olu 'e pitzinnia
in su tempus present'e gal'a bennere.

M'isto chin sa pantamas de sa mente
patinde 'e sa 'etzesa donni'affrontu
chin s'alinu iscurosu 'e su tramontu
chi mi brivat de lughe e de caente.

In su frittu desertu 'e sa paura
bido craru su vasu de Pandora
da-e su cale bessidu nde so' fora
po sighire su ciclu 'e sa natura.

Lassand'in segus fertas e illusiones
chin frorin in sas andalas terrenas
e sizare sa 'oghe 'e sa sirenas
chi cantana d'isperas e passiones.

Chi cantan d'una tanca a froes d'oro
e dan a sos intzertos un'indissiu,
chi cantan de sa die 'e su zudissiu
inue s'urtima paga hat donnia coro.

Est cantu da ammaju e de traschia
po unu caminu chene torradorzu
inue sa lughe indittat s'iscusorzu
fattu d'eternidade e de poesia.

Istajones

1° PREMIO - POESIA SENZA RIMA AL PREMIO POESIA SARDA DELLE ACLI DELLA SARDEGNA - XXII EDIZIONE, 2010

Epuru nou
intonadu chin s'arpa de su coro:
unu drinnire de lampizos d'oro
beraniles
chi sa janna 'e sos bisos aperiat.

Como
s'est fata prantarita
cuss'antiga cantzone
e bolat
imbriaga de vida
peri chelos in muda
in d-un'eterna chirca
de pruddedos de fogu
e sos tintinnos d'un'antigu jogu
chi de frores nuscosos
e marfilii
sa cara li mudain.

Ma frutos cromptidos
los at fatos s'istade
e sa frina
sero sero lis dat unu carignu
a sas primas friscuras de s'atonzu.

Su tempus
bestidu de cardanas e de nie
in tundu m'at balladu
pintandemi sos pilos de biancu;
epuru
apo 'ahi un'iscusorzu...
un'iscusorzu mannu
(siendas de una vida in cumonia)
che rechillias collidas
in s'aposentu 'onu
e che a tando
aperzo sa janna de sa note
e mi perdo
in sa mirada 'e sonajolos d'oro.

Mammas

Menzione d'Onore al 7° Premio di Poesia in Lingua Sarda Circostrizioni n° 2 e n° 3 di Sassari

Pelea peleas andande
una terra an lassadu
sas mammas de s'ispera
po sizire unu sónniu
de pane e de luna
in sa terra prominta
innedda
dae cussos malos tronos
ue babbos e frades e maridos
non morzan
e sos pipios
unu risittu attattu
li pesen a su chelu.

Sas mammas de su coro
terras an acattadu
chi jagaran s'istranzu
chi s'istranzu accollozin
e iscufortu antigu e timoria
tott'a palas si 'ettan
cand'un'istilla 'e mele
a isporados ómines istrinan
sas mammas de su mundu...
Mammas nieddas
mammas biancas:
sas mammas de s'ispiritu 'e sa vida.

In carreras chi andan
in carreras chi 'enin
sas mammas de sa terra
pelea peleas andande
unu sónniu de lughe ane servadu
e s'imortalidade intro su sinu
po dare visiones
po dare àttera cara
a su mundu 'e sos ómines
inue tottu sas mamas
crescan a pane e luna
sos fizos de su cras.

Madri

Trascinando la vita
una terra lasciarono
le madri della speranza
per inseguire un sogno
di pane e di luna
nella terra promessa
lontano
dai mortiferi tuoni
dove padri e fratelli e mariti
non muoiano
ed i bambini
un satollo sorriso
elevino lassù.

Le madri del cuore
terre trovarono
che scacciano il diverso
che il diverso accolgono
e lo sconforto antico e la paura
disperdono lontano
quando una dolce stilla
a scoraggiati uomini regalano
le madri del mondo...
Madri nere
madri bianche:
le madri dell'essenza della vita.

Su strade che vanno
su strade che vengono
le madri della terra
trascinando la vita
un sogno di luce han conservato
e l'immortalità nel proprio seno
per donare visioni
per dare un altro volto
al mondo degli uomini
dove tutte le madri
con pane e luna allevino
i figli del domani.

Notte d'Ómines

1° Premio "Concorso di Poesia e Prosa Costantino Longu" Bolotana 2002

In andala 'e mudine
de ispiritu d'ornine
de boidores mannos
e ràntzigos affannos
su tempus so' chirchande,
gramuzande
paràulas e pessos
in custa notte fritta
chei s'anima mia
isticchia
interi sos isteddos
chi lùghene che làgrimas de pratta
e falan dae s'atta
a custa terra 'e preda
perdida in d'unu sónniu
de lughe e de iscuru:
sónniu mannu de sorte
ue craitera est sa morte
e paret de intender una oghe
a nareju d'eternas povertades
e de disamistades
finidas in sa losa.
Sa luna essit pomposa
ponèndosi 'e fures su cuguttu
e sa notte
cumparit pius notte
e pius in dolu.
Una funtana
a bolu
cantat un'anninnia
a custa terra mia
de pupas aumbrada.
Péridu apo su tempus
in custu mundu 'e cosas virtuales
ue fémminas noàles
no hane prus sapore chei su 'inu brandu
chen'ardore;
chei custa vida mia
chi unu manzanu s'est istramudia.

Passos

Menzione al Premio di poesia sarda "Barore Sassu" Banari 2010

Derrutu su cuile
che-i custos versos mios
a distempus:
boghe de metaforas d'irvaliu
in andalas d'afetos
e memoria
inue a passu lenu
trazo antigas visions
d'unu sonniu pitzinnu.

Custu cantare miu
sa lacana 'e sos annos no aguantat
e in s'avantare perdet
tintinnos de sonazos
arvadas ruinzadas
e cudd'illampizada de foetes
truvande a Purpurinu
e Bucchiarvu.

Sa fantasia
elettronicos trastes l'ana ferta
e no allegat prus
chin sa 'oghe 'e sas janas
nen chi boghe de mortos
chi isticchios iscusorzos
promintian.

Solu jeo
ne assiendau nen saviu
poeta chene oje e chene cras
ando 'alu piccande una chimera
de gherreris de brunzu
rutos
ue sa paraula est morta.

Sas manos mias boidas
chen'asore
non mantenen cust'urtim'utopia
chi ponet alas
de noales visiones de amaju
e mi lassat in segus
che balladore
chi perduu at su passu.

Poeta

2° Premio al "Quartucciu 2009" Sezione Poesie in versi liberi

Cantu mi so imbriacau
in sas muscosa andalas de 'eranu
bufande in sa 'upada de sos nuscas
chi visiones daian.

Cantu discodiu
lassande sos fedales
a assiendare terras e palatos;
atatos
colan in sas carreras de sa vida.

Custas buzaccas mias
nudda an aorrau
in su contu corrente de su tempus:
ne istimas nen cosa.

Ap'amorau chimeras
chi mi jamain chin boghes de amaju
e miradas de luna
chi in sa carre su fogu mi ponian
e pistichinzu in coro
cando chircao
cosas de pacu asore
chi nessunu cheriat
e pessao
d'aere perdiu sos sinnos
de s'umanu colare.

Ma tando 'ipi minore
e no ischio
d'essere ieo etotu cussu 'entu
chi 'e durcuras che di dolcezze
at cust'andare miu populau
semenande iscusorzos
chi si mustrain sos seros
irrajande promintas
e poemas
de leporeddas candidas de prata
naschias
dae s'isteddu luchente 'e chenadorzu
po colorare
una pazina noa
de su coro de s'omine prus riccu:
unu piseddu coro de poeta.

Poeta

Quando mi inebriai
su sentieri odorosi
bevendo dalla coppa degli odori
che facevan sognare.

Quanta trascuratezza
nel lasciare i coetanei
a fare incetta di terre e palazzi;
sazi
passano sulle strade della vita.

Queste mie tasche
niente conservarono
nel conto corrente del tempo:
né amori né beni.

Ho amato chimere
che mi invitavano con voci accattivanti
ed occhiate di luna
che il fuoco nel corpo m'infondevano
e frenesia nel cuore
quando cercavo
cose senza valore
che nessuno voleva
e pensavo
d'aver perso la bussola
dell'essenza dell'uomo.

Ero giovane allora
e non sapevo
d'essere io stesso quella brezza
che di dolcezze
ha questo mio vagare popolato
seminando tesori
che ogni sera apparivano
regalando promesse
e poemi
di farfalline candide d'argento
nate
dalla stella più fulgida
per colorare
una nuova pagina
del cuore dell'uomo più ricco:
Il cuore d'un poeta bambino.

Promintas

2° Premio- Sezione B - Premio Biennale di Poesia in Lingua Sarda "A pes de Santu Padre"
Bortigali 2013

Rugande

issumessias de animas e oras
in dies instantissadas
s'andala 'e sa terra apo perdu
e derettura 'e s'oje e de su cras
chi ghiaiat sa vida...

Presoneri

de su chelu a sa terra lassinadu
m'agatto iscaminadu
chene chelu
nen terra
nen regra
de su mele chi s'anima sassiait.
Nèula est su 'enidore
e su coladu
in pes tottu mi ruet
che abba chi si fuit intèri poddighes.

S'anima

de promintas antigas abeliada
chircat sa bona 'ada
in su pradu 'e sa luna
e a costazu 'e s'umbra de s'istria
chi m'indittat sa 'ia
andan sos pessos mios...

Sos pipios

a zorrugada fatta
como in tancas de prata
arveschidorzas sonniana d'ispera...

Promesse

- Valicando / moltitudini d'anime e di ore / in giornate stantie / il sentiero della terra ho perduto / e il
senso del presente e del futuro / che guidava la vita... //

- Prigioniero / del cielo scivolato sulla terra / fuorviato mi trovo / senza cielo / né terra / né favo /
che di miele l'anima saziava. / Foschia è il futuro / e il passato / sui piedi mi cade / come acqua che
scorre fra le dita. //

- L'anima / di antiche promesse infatuata / cerca la buona fata / sul prato della luna / e con l'ombra
del barbagianni / che mi indica la via / vagano i miei pensieri... //

S'umbra

3° Ex aequo Setzione Versos Liberos Concorso di Poesia Sarda "Antoni Piludu" 2009 di Scano Montiferro

Frimu su coro miu
in sa terra 'e sos mannos;
terra d'iscras e preda
surcada da' invasores elettronicos
chi totu istramùdin:
meres de pessos lestros
d'allegas tirriosas
de su nudda de plàstica
ue su tempus si parat
ue su tempus est umbra
e morte e vida
s'iffranchian a pare
crochinde pantamas
chi colan sos sentidos
in chilivros digitales.

Unu bisu so chircande
e sonos de paràulas
chi tocain orizontes isconnotos
àidos aperinde
interi chelu e terra
cando terra fit su chelu
e chelu e terra sònniu e passione.

Totu
a su cumentzu
fin a misura d'òmine sas cosas
ma como
istranas parpàines an ghetau
in chirca de soles noales.

In labirintos de terabyts
e avrinzos passizeris
òmines de carre
perden su passu
chircande su segretu
de sas cosas sinnadas
dae su còditze a sias
e illuinaos
su nùmeru 'e s'ànima baratan
a cambiapare 'e siendas caminantes.

Dillirios d'assolutu
m'imbrician de un'ùrtimu sònniu.

L'ombra

Sospeso il mio cuore
nella terra degli avi;
terra d'orti e di pietre
solcata da elettronici invasori
che tutto trasfigurano:
signori dai pensieri fulminei
dai cicalecci metallici
nel nulla di plastica
dove il tempo si ferma
dove il tempo è ombra
e morte e vita
si graffiano a vicenda
fermentando fantasmi
che vagliano i sentimenti
con setacci digitali.

Un sogno sto cercando
e suoni di parole
che toccavano orizzonti sconosciuti
schiudendo passaggi
fra il cielo e la terra
quando la terra era il cielo
e cielo e terra sogno e passione.

Tutte
all'inizio
a dimensione umana eran le cose
ma ora
strane propaggini estendono
alla ricerca di novelli soli.

In labirinti di terabyts
ed entusiasmi passeggeri
uomini di carne
perdono il ritmo
cercando il segreto
delle cose segnate
dal codice a barre
e abbacinati
il numero dell'anima barattano
in cambio di tesori semoventi.

Deliri d'assoluto
m'inebriano d'un ultimo sogno.

Tra coro e terra

3° Classificato – Premio Poesia “Città di Iglesias” 2013

Apo perdiu su tempus!...
Su tempus s'est fuidu
tra abelios e vida
ue sas oras
an fattu una pintura amacchiada.

Lestru avantat s'ieru
parande praderas
in cust'andala chene pasadorzu
e animas istratzat
che-i su edone dae s'ortu.

A muridina est torrau
su palattu
chi tziu Nanneddu at fattu
furande
s'onore e su valore a sos teracos.

Grae est su chelu
e grae est sa terra...
Su pessu
che istasida ischintidda
est mama 'e sole tra impuddiles fritos
e desertos de zustissia
chi menettan
iscurigadas d'irmentigu.

Sa notte isprasumada
dae janna in janna colat
contande veridades
chi iscolorin
su sonniu ruju de sa chiriasa.
Sos anghelos suos de terra
sa terra istat giamande;
s'amiga mia Soledade
mumungiat versos d'agunnortu
chi s'anima pertunghen.

Tra coro e terra
tra coro e chelu
taneas chene pasturas
ue solu sos dillirios
cuardos ponen pè...

Tra cuore e terra

Ho perduto il tempo!...
Il tempo è fuggito
fra vita e passioni
dove le ore
un folle quadro hanno dipinto.

Lesto avanza l'inverno
trappole seminando
lungo questo percorso senza requie
e anime strappa
come orbaccia dall'orto.

Una rovina è diventato
il palazzo
che zio Nanneddu eresse
rapinando
ai servi l'onore ed il valore.

Greve è il cielo
e greve è la terra.
Il pensiero
come fiacca scintilla
è un lume fra gelide aurore
e deserti di giustizia
che minacciano
tramonti d'oblio.

La notte intemorita
passa di porta in porta
narrando verità
che sbiadiscono
lo scarlatto sogno del ciliegio.
I suoi angeli di terra
la terra sta chiamando;
la mia amica Solitudine
bisbiglia versi di coraggio
che l'anima trafiggono.

Fra cuore e terra
fra cuore e cielo
tanche infeconde
dove solo i deliri
timidamente avanzano...

Tziu Bore

In arcos savios de pregadoria
pesat su punzu prenu tziu Bore
incumandende tottu a su Sennore:
su semene, s'ispera, sas fatigas,
e su disizu 'e prosperas ispigas
nuntzias de pane brundu e d'allegria.

Lentos, lentos, in s'umidu terrinu,
andant sos boes, sutta su juale
attentos a sa fune 'e s'origale
chi los ghiat in s'umile dovere
e a sa 'oghe istriga de su mere
chi los giamat Murreddu e Purpurinu.

Chin lampos de attarzu, sa arvada,
e su narbone, apertu l'at su coro
e sas creas custodin su tesoro
po lu torrare in atter'istajone.
In fattu de d'aradu, unu putzone,
dat timende e famidu una biccada.

Cando su sole bassu de s'attonzu
s'eclissat in su canu Gennargentu
tziu Bore s'imbrenugat cuntentu
in su ritu 'e su pane e de su casu
e cand'irfattu si godit su pasu
pesat a chelu un'innu 'e sorrogonzu.

In sa barracca orulat su 'entu
chircande su massaju solu, solu
ma issu cumentzadu hat unu 'olu
in s'oniricu mundu 'e su piaghene
e a costazu intendet sa muzere
chi li faghet d'amore incantamentu.

E li paret de 'ider sa balente
manu de tzia Frantzisca, sedattande
in su frundacu, u'est accurande
sas isportas de simula e farina
pintande de biancu sa cughina
chi paret dare un'atteru caente.

O su cantu 'e su tuturu in sa mesa
cando dat vida e briu in bighinadu
po unu pane modde regaladu
chi prendet s'amistade e s'unione
o po unu pizu tostu de 'imisione
chi hat su gustu de sa poveresa.

E sonniat de messeras e laores
e arzolas de manigas fioridas
e bucas innossentes chi, famidas,
irvettan da-e tziu Bore su succurru

e sa palitta chi 'ogat da-e su vurre
sa paga a sas fatigas e suores.

Una poesia de frinas carinnosas

Primo Premio - 19° Concorso di poesia in Lingua Sarda "Sant'Antoni de su o'u" di Mamoiada

Un'urtima poesia cherzo pintare
chin arrodaos chintales
e isprumas de mare furiosas
chi irfranchien sas dozas de su mundu.
Una poesia chi drinnat
tra montes de ispera:
chi cantet sa zustissia de sa vida
sa zustissia 'e sa morte
e cudda veridade
chi chircan chene pasu
sonniadores armados de paraulas
in lacanas de notes e de dies
e in disintzertas lacanas de coros.
Una poesia de frinas carinnosas
chi cruset sas praas de su discodiu
e illughidet sas demos
de 'isiones caentes;
una poesia braghera
chi intrizet sas tramas de s'iscuru
chin frumenes de lughe
chin padentes de omines
chi allegan de vida a manu tenta
e prenden in s'artare de sa luna
sas allegas de brunzu.
Una poesia chi azuet a si pesare
cuddos chi medas bortas sone rutos
e meda an batallau
a caddu 'e Ronzinante
cumbatende sas umbras de su mundu
o chircande
in su coraddu allutu de sos chelos
s'amore 'e Dulcinea:
donna passu unu sonniu
donna sonniu un'isteddu
chi galanias promintet su manzanu.

Una poesia chi ponzat alas levias
e in buzacca
un'urtimu dilliriu de durcura.

Una poesia di tenere ariette

Un'ultima poesia voglio dipingere
con bagliori affilati
e spume di mare furiose
che artiglino i dolori del mondo.
Una poesia che squilli
fra alture di speranza:
che canti la giustizia della vita
la giustizia della morte
e quella verità
che instancabili cercano
sognatori armati di parole
in frontiere di notti e di giorni
e in ambigui limiti di cuori.
Una poesia di tenere ariette
che rimargini le piaghe di solitudine
e illumini le case
di festose visioni;
una poesia elegante
che tessa le trame delle tenebre
con fiumi di luce
con foreste d'uomini
che fra di loro parlano di vita
e annodano sull'altare della luna
i discorsi di bronzo.
Una poesia che aiuti a rialzarsi
quelli che tante volte son caduti
e moltissima duellarono
a cavallo di Ronzinante
combattendo le ombre della terra
o cercando
nel fiammante corallo dei cieli
l'amore di Dulcinea:
ogni passo un sogno
ogni sogno una stella
che incanti promette l'indomani.

Una poesia che ponga ali leggere
e in tasca
un ultimo delirio di dolcezza.

Una zirada d'ogru

1° Premio - Sezione Poesia a tema libero al Benvenuto Lobina di Villanova Tulo - 2012

M'abelio
sonniande chiriasas in fre...

Sos ojos aperzo
a su nuscu 'e su fruttu crompiu.

Sa morte
faghende sa posta est inie...

Versos

3° Premio ex aequo alla 2ª Edizione del Premio Biennale di Poesia in Lingua Sarda "A pes de Santu Padre" 2011

Irfattu est su sero
sa lantia mortura
e zeo
unu versu so chircande...
su versu mai iscrittu
immortale
su versu de su bene e de su male!
Ma fortzis...
su bene chin su male
sone solu s'imbentu
d'antigos benduleris de paràulas.

Unu versu so chircande
de iscrier in sa pira de su pane
in coro 'e sos amigos
in manzanos de sentidos
in cara de sa vida e de sa morte.
Unu versu che leppa
po truncare sos lovros de sa notte
cand' ómines mantenent presoneris.
Sos versos de eris
sos versos de crasa
po fraicare carreras de poesia.
Versos de chidériu...
versos animosos
versos imbriagos d'illusione
chi 'olen in s'aera
a inchèndere isteddos de ispera.

Versos
mancari a frighinitas
che carignos dae corvos pittulados
versos bramados
chi sas janas cantadu nos aian.
Versos che campanas in festa
po istrajare lampizos
de astros ierriles chi amuinan
chin tunchios canudos d'astraoe.

Intreverau de versos
che a mimi chen'asore e chene 'oghe
colo 'alu sas nottes semenande
versigheddos de sole.

Versi

- Stremata è la sera / fioco il lume / ed io / un verso sto cercando... / il verso mai scritto/ immortale / il verso del bene e del male! / Ma forse / il bene con il male / sono solo l'invenzione / d'antichi venditori di parole.
- Un verso sto cercando / da scrivere sul pane d'ogni giorno / sul cuore degli amici / in albe di passioni / sul volto della vita e della morte.
- Un verso affilato / per recidere i lacci della notte / quando uomini tiene prigionieri. / I versi di ieri / i versi di domani / per costruire percorsi di poesia. / Versi strillati... / versi audaci / versi inebriati d'illusione / che volteggino in alto / ad accendere stelle di speranza.
- Versi / magari sbriciolati / come carezze beccate dai corvi / versi aspettati / come quelli bisbigliati dalle fate. / Versi come campane in festa / per scacciare bagliori / di invernali astri che molestano / con gemiti di gelo imbiancati.
- Dipendente dai versi / come me senza voce nè vigore / passo ancora le notti seminando / versetti di sole.